



REPUBLIKA E SHQIPËRISË
**AUTORITETI I KONKURENCËS
KOMISIONI I KONKURENCËS**

VENDIM
Nr. 527, Datë 14.06.2018

“Për dhënie rekomandimi Entit Rregullator të Energjisë lidhur me kontratën tip për shitblerje të energjisë elektrike ndërmjet OSHEE dhe PPE”

Komisioni i Konkurrencës me pjesëmarrjen e:

Znj. Juliana LATIFI	Kryetar
Z. Eduard YPI	Zv/Kryetar
Znj. Leida MATJA	Anëtar
Znj. Adriana BERBERI	Anëtar
Z. Helidon BUSHATI	Anëtar

Në mbledhjen e tij të datës 14.06.2018, shqyrtoi çështjen me:

Objekt: Dhënie e disa rekomandimeve Entit Rregullator të Energjisë mbi ndryshimet e propozuara nga OSHEE SH.A lidhur me kontratën tip për shitblerje të energjisë elektrike ndërmjet OSHEE SH.A dhe prodhuesve me përparësi të energjisë elektrike.

Bazë ligjore: Neni 24, germa d) dhe f); neni 26; neni 69 dhe 70 të Ligjit Nr. 9121, datë 28.07.2003 “Për Mbrojtjen e Konkurrencës” (i ndryshuar).

Komisioni i Konkurrencës pas shqyrtimit të:

- Relacionit mbi ndryshimet e propozuara nga OSHEE SH.A lidhur me kontratën tip për shitblerje të energjisë elektrike ndërmjet OSHEE SH.A dhe prodhuesve me përparësi të energjisë elektrike.

VËREN SE:

Pranë Autoritetit të Konkurrencës është depozituar shkresa e ERE me nr. 289 prot., datë 29.03.2018, nëpërmjet së cilës kërkohet mendimi i Autoritetit të Konkurrencës mbi vendimin e Bordit të ERE nr.74, dt. 26.03.2018 mbi fillimin e procedurës për shqyrtimin e disa shtesave dhe ndryshimeve të propozuara nga shoqëria OSHEE SH.A në “kontratën tip për shitblerje të energjisë elektrike ndërmjet OSHEE SH.A dhe prodhuesve me përparësi të energjisë elektrike”.

Në vijim lidhur me ndryshimet e propozuara si më sipër, Shoqata Shqiptare e Energjisë së Rinovueshme (AREA) ka përcjell pranë AK-së komentet e saj në lidhje me sugjerimet e OSHEE për ndryshime në kontratën tip të shitblerjes së energjisë për prodhuesit me prioritet, protokolluar pranë AK-së me nr. 144/2 prot, datë 31.05.2018.

Nga shqyrtimi i shtesave dhe ndryshimeve të propozuara, rezulton se:

Kontratat e shitblerjes së energjisë elektrike ndërmjet OSHEE SH.A dhe prodhuesve me përparësi të energjisë elektrike do të lidhen me një afat të gjatë prej 15 vjetësh dhe me një çmim të përcaktuar nga ERE, çmim i cili nuk do të ndryshojë për periudhën e kontratës.

Kjo mënyrë përcaktimi bie në kundërshtim me vetë periudhën një vjeçare të miratimit të çmimeve nga ERE, konkretisht sipas vendimit nr. 120, datë 27.07.2017 "Mbi përcaktimin e çmimeve të blerjes së energjisë elektrike të prodhuar nga burimet e vogla gjeneruese fotovoltaike me kapacitet të instaluar deri në 2 mW dhe eolike me kapacitet të instaluar deri në 3 mW". Gjithashtu kjo është pasqyruar edhe në nenin 11 "Çmimi" të kontratës tip, pikën shtesë (pika 4), ku përcaktohet shprehimisht se: "ERE përcakton dhe miraton me vendim brenda vitit aktual çmimin e shitjes së energjisë për vitin pasardhës".

Nga vlerësimi i vlerësimi i legjislacionit përkatës rezulton se:

Ligji i ri 7/2017 "Për nxitjen e përdorimit të energjisë nga burimet e rinovueshme" parashikon skema mbështetjeje për PPE sipas Kontratës për Diferencë, të cilat do të kenë një kohëzgjatje maksimale prej 15 vjetësh. Kontratat për diferencë do të jepen nëpërmjet një procesi konkurrues. Mbështetja jepet në formën e një shpërblimi për arritjen e çmimit të caktuar, si një shtesë mbi çmimin e referencës. Masat mbështetëse për prodhimin e energjisë elektrike nga burime të rinovueshme, në çdo rast jepen në përputhje me legjislacionin në fuqi për ndihmën shtetërore.

Mbështetja sipas kontratës për diferencë nuk zbatohet për prodhuesit me përparësi: me kapacitet të instaluar të energjisë elektrike të prodhuar nga burimet e vogla gjeneruese fotovoltaike deri në 2 mw dhe me kapacitet të instaluar deri në 3 mw për energjinë e erës. Çmimi i blerjes së energjisë elektrike nga këta prodhues me përparësi, në bazë të nenit 10, pika 3 të Ligjit nr. 7/2017 "Për nxitjen e përdorimit të energjisë nga burimet e rinovueshme", caktohet nga ERE.

ERE ka detyrimin e përcaktimit të çmimit të blerjes së energjisë elektrike të prodhuar nga burimet e vogla të rinovueshme nga dielli dhe era, në përputhje me metodologjinë e miratuar me VKM nr. 369, datë 26.04.2017, "Për miratimin e metodologjisë për përcaktimin e çmimit të blerjes së energjisë elektrike të prodhuar nga burimet e vogla të rinovueshme nga dielli dhe era", në përputhje me çmimin e mesatarizuar për vitin 2017, sipas parashikimeve të kësaj metodologjie.

Sipas pikës 2 të Vendimit të ERE nr. 120, duke filluar nga viti 2018, ERE, në bazë të grumbullimit të të dhënave, përsa i përket kostove reale të investimit, për investimet në vijim, nëse rezultojnë të ndryshme nga parashikimet e VKM nr. 369 datë 26.4.2017, "Për miratimin e metodologjisë për përcaktimin e çmimit të blerjes së energjisë elektrike të

prodhuar nga burimet e vogla të rinovueshme nga dielli dhe era”, merr përsipër t’i propozojë MEI përmirësimin dhe rishikimin e kësaj VKM-je.

Bazuar sa më sipër duke qenë se mënyra e përcaktimit të çmimit dhe afatet e kontratave të shitblerjes së energjisë midis OSHEE dhe PPE janë të përcaktuara paraprakisht në ligj, VKM-në për miratimin e metodologjisë si dhe vendimet e ERE, me argumentimet përkatëse të konsideruara të qëndrueshme për fazën fillestare të fillimit të funksionimit të burimeve të energjisë së rinovueshme nga dielli dhe era, nevojitet një pasqyrim më i qartë i këtyre kushteve në kontratë.

Për sa i përket çmimit të shitblerjes së energjisë elektrike, ai nuk mund të jetë i pandryshueshëm për gjithë periudhën e kontratës, maksimumi 15 vjet, pasi kjo jo vetëm që bie në kundërshtim me vetë periudhën një vjeçare të miratimit të çmimeve sipas metodologjisë së miratuar me VKM nr. 369 datë 26.4.2017, si dhe vendimit të ERE nr. 120, datë 27.07.2017 "Mbi përcaktimin e çmimeve të blerjes së energjisë elektrike të prodhuar nga burimet e vogla gjeneruese fotovoltaike me kapacitet të instaluar deri ne 2 mw dhe eolike me kapacitet te instaluar deri ne 3 mw", por mund të përbëjë rrisht për konkurrencën në treg.

PËR KËTO ARSYE:

Komisioni i Konkurrencës, bazuar në nenet: 24, germa d) e f); 69 dhe 70 të Ligjit Nr. 9121, datë 28.07.2003 “Për Mbrojtjen e Konkurrencës” (të ndryshuar), me propozim të Sekretariatit,

V E N D O S I:

- I. T’i rekomandojë Entit Rregullator të Energjisë, si vijon:
 - a) *Në kontratën e shitblerjes së energjisë midis OSHEE dhe PPE të pasqyrohen drejt parashikimet ligjore lidhur me afatin e kontratave dhe rregullimin e çmimit duke e orientuar atë drejt kostove reale të investimeve, bazuar në kthimin e arsyeshëm të vlerës së tyre, dhe me një kohëzgjatje të arsyeshme.*
- II. Ngarkohet Sekretari i Përgjithshëm për njoftimin dhe ndjekjen e zbatimit të këtij vendimi.

Ky vendim hyn në fuqi menjëherë.

KOMISIONI I KONKURRENCËS